

# Witōm Cie Babcio.

Wiyem żech downo niy pisał ale miolzech fest duzo roboty i ciynzko mi było zność tymat ô czym moga Ci ôpowiydzieć. Jak wiysz terozki jezech w gōrach Papui Nowyj Gwineji w miejscu kere nazywo sie Par.Gryfne miejsce położōne pomiyndzy goōrami. Fest malowniczo ułożōne i cud widoczek, kej nad rankym chmury przykrywają szczyty gōrōw. Moji przełożyni posłali mie sam na doświadczyniy wspōlnotowe i poznani kultury i gōrali.

A dodatkowo pomogōm w klinice w Yampu, kery jest ôdległy 6 km od Par. Robia tam najczynściy na kōmputerach, uzupełniōm baza danych ôsobōw chorych na HIV, a powiyem Ci że ich je fest duzo, i to w rōżnych latach, ôd niemowlakōw kere urodziły się z HIV, bo mama była choro, potym młodzi kerzy gibko zaczyno tukej wspōłżyć, na kōniec starsi tyż. Umieralność na HIV tyż je wielgo bestōż, że jak chorzy zgłoszajōm sie do lazaretu to bierōm tabletki ale jyno do czasu. Jak sie lepij poczuji to przestowajōm ,wtedy ôdporność spado i umiyrajōm na byle jako ryma nawet.

Dodatkowo moja robota to szofer. Jeżdza ambulansym ze chorymi do najblizszego lazaretu na ryntgyny abo na szczypiynia po szkołach ze siostrami i Sr. Jadwigōm kero je szefowōm lazaretu jechac po towor abo jakiś spotkania. Podobo mi sie to, bo mom możliwość jyzdzynio wielōma autami, ôd małego Suzuki, kery je jak "Maluch" z napyndym na 4 koła po Land Cruiser, kery je tak mocny, że bez problymu wiedzie po szpadzistych i rozwalōnych drōgach. Co do drōgōw to miejscami sōm taki fatalne, że trudno ôpisać. Kamiynie wszyndzi, dziura na dziurze i w nich jeszcze dziury. Na tych wōnskich drōgach, dodatkowo trza uważać na ludzi, kerzy niy zważajōm na to, eli jakiś auto jedzie. Trza tyż uważać na kozy i świny ,kere łażōm po drogach, kaj chcōm. Jakbych przejechoł powiydzmy maciora, to bych musioł płacić wielgi ôdszkodowaniy i niy yno za ta świnią ale tyż za prosioczki kere mōgła mieć. Niy dej Pōnbōczku jakbych dugnył człowieka a jeszcze gorzy- umrzył by skuli tygo ,to nojlepij do mie to spakować sie i uciykać z Papui, bo mie znojdzie familija i no cōż, zabijōm w amoku. Wiyem że ciynzko sie ło tym czyto, ale tako prowda. Wszyscy mi tyż godajōm, że jak by mi sie zdarzyło piznyć kogoś, to ni mōm stować ale jechać na najblizszy policyjo, bo inaczej mnie zbijōm i rozkradnōm auto. Tu na ludzi nie moga patrzyć z perspektywy naszej kultury i wartości, bo sam je cołkym inaczy. Niy bōj sie Babcio- jeżdza ôstrożnie i niy gupna na drōgach i mōm nadziejo, że jak przyjada bez tyn rok na feryje na Ślōnsk do Polski ,to niy byda chcioł jeździć po lywej strōnie drōgi tak jak tukej.

Tukej ludzie sōm dobrzy, ale bardzo podatni na alkohol i narkotyki, a jak się napijōm albo pokurzōm Marihuany to potym gupnōm , wadzōm sie i robiōm haja. Marihuana sam rośnie wszyndzij i jest nojlepszej jakości. Potym podobno przemycajōm do Australii. Ostatnio widziolzech auto policyji na kierym był rozwieszony marihuanom, myśla że znoleźli jakoś plantacjo i wziyli do zniszczynio. Rozbawiyło mie to, bo wyglōndało to auto jak chojinka. Wiyem że napisoł żech, same negatywne sprawy, ale sōm tu tyż pozytywy. Ludzie ôddani kościołowi i inszym ludziom, ôsoby kiere kiedyś pogrōnżone nałogami abo kiere były bandziorami zmiyniajōm swoji zyciy i dajōm dobry przykłąd i pomagajōm innym. Wiyem Babcio, że zajmnie mi na pewno całe

życiu, by zrozumieć tutejszych ludzi, bo różniom się fest od nos. Tukej w gōrach byda do moja, kiedy to najpiyrw poleca do Wewek, na spotkani modych misjōnarzy werbistōw ,kierzy sōm w Papui mniyj niże piyć rokōw. Potym przyleca sam nazod, spakuja sie i pojada do Madang, kaj byda jakiś tydziyń i przeleca z moimi gratami do Port Moresbi, bo tam jak przyjada ze feryji przełożyni mnie posyłajōm, byda żył w malej wspōlnocie a robić w redakcyji tygodnika Wantok. W sumie się raduja z takij decyzji ôjca Prowincjała, bo przaja tymu miastowi i takj robocie. Tam byda mōg rozwijać moji umiyjntności, bo teroz, jak na razie to skłodoł żech ksiōnżki, czy jakieś modlitewniki do kaźdego, kery poprosiył.

Wiysz babcio że nie umia się doczkać kiedy przyleca na feryje i Cie ujrza, ale musza być cyrpliwy bo do czyrwca jeszcze duzo czasu.

Pozdrowiōm cie i przaja Ci fest.

**Z Bogiym**  
**Twōj wnuczek.**  
**Misjōnarz.**

